

# Mga Pamaagi ug mga Kahanas sa Pagtuon sa Kasulatan

**Pagpuli sa pangalan:** Aron sa pagtabang nga inyong masabtan ang mga doktrina ug mga baruganan gikan sa mga kasulatan sa inyong kinabuhi, pulihi sa inyong pangalan ang pangalan nga anaa sa mga kasulatan. Sulayi ang paggamit niining kahanas sa pagtuon sa kasulatan sa pangalan ni Pedro sa Mateo 16:15–17.

**Hinungdan ug epekto:** Sa pagtabang ninyo nga makaila og mga baruganan sa ebanghelyo diha sa mga kasulatan, pangitaa ang “kon–dayon” ug “tungod kay–busa” nga mga kalambigitan. Sulayi paggamit kini nga kahanas uban sa Mateo 6:14–15.

**Mga lista sa kasulatan:** Ang mga kasulatan usahay dunay mga lista sa mga butang, sama sa mga instruksyon o mga pasidaan. Kon makita ninyo ang mga lista, ikonsiderar ang pagbutang og numero sa matag elemento. Sulayi ang paggamit niini nga kahanas uban sa Mga Taga-Galacia 5:22–23.

**Sa pagtandi:** Ang mga kasulatan usahay nagtandi og lain-laing mga ideya, mga hitabo, ug mga tawo. Kini nga mga pagtandi naghatag og gibug-aton sa mga baruganan sa ebanghelyo. Pangitaa ang mga pagtandi sa usa ka bersikulo, sa mga kapitulo, ug sa tibuok kapitulo ug mga libro. Sulayi kini nga kahanas uban sa Mateo 5:14–16.

**Visualization:** Pangitaa ang mga mahulagwayon nga mga detalye nga makatabang ninyo sa paghunahuna og litrato samtang kamo nagbasa. Hunahuna nga diha sa usa ka kalihokan. Kini mopalig-on sa inyong pagpamatuod sa katinuod sa inyong gibasa diha sa mga kasulatan. Sulayi kini nga kahanas uban sa Mateo 8:23–27.

**Simbolismo:** Ang mga pulong ingon sa *sama*, *ingon sa*, o *gipahisama ngadto* makatabang ninyo sa pag-ila og mga simbolo. Tan-awa lapas sa simbolo pinaagi sa pagsusi sa kinaiyahan ug pagpamalandong sa mga hiyas niini. Ang mga tabang sa pagtuon sa kasulatan sama sa footnotes, sa Bible Dictionary ug sa Topical Guide o Giya ngadto sa mga Kasulatan makatabang ninyo sa paghubad sa pipila ka mga simbolo. Sulayi ang paggamit niini nga kahanas sa pagtuon uban sa Mateo 13:24–30.

**Mga Cross-Reference:** Sa kasagaran, usa ka tudling sa kasulatan makapasabut o makapaklaro sa pulong o konseptong makita sa laing tudling. Isumpay ang mga tudling sa kasulatan sa usag usa ginamit ang mga footnotes, index, o ang Topical Guide o Giya ngadto sa mga Kasulatan sa pagtabang nga masabtan ang kahulugan sa usa ka tudling sa kasulatan. Pagpraktis niini nga kahanas pinaagi sa pagbasa sa Juan 10:16 ug dayon sa mosunod nga cross-reference sa footnote a sa 3 Nephi 15:21. Sa unsa nga paagi nga ang pagbasa sa 3 Nephi 15:21 makatabang ninyo nga mas makasabut sa kahulugan sa Juan 10:16?

**Pamalandong:** Ang pagpamalandong naglakip sa paghanduraw, paghunahuna og lawom, pagpangutana, ug pagtimbang-timbang unsa ang inyong nahibaloan ug unsa ang inyong nakat-unan. Ang pagpamalandong sa kasagaran makatabang nato nga makasabut unsay atong gikinahanglan nga buhaton aron sa paggamit sa mga baruganan sa ebanghelyo. Palandunga unsaon ninyo sa paggamit ang mga kamatuoran sa Mga Hebreohanon 12:9.

**Paggamit:** Samtang ang inyong pag-ila ug pagsabut sa mga doktrina ug mga baruganan nga makita sa mga kasulatan, kamo makaangkon og mas lawom nga kahibalo pinaagi sa pagsunod sa mga kamatuoran nga inyong nadiskobrehan. Si Jesukristo miingon “kon tuyoan ni bisan kinsa ang pagbuhat sa kabubut-on sa [Langitnong Amahan], nan, iyang mahibaloan kon ang akong gitudlo gikan ba sa Dios, o magsulti ba lamang ako sa kinaugalingon kong pagbulot-an” (Juan 7:17). Pangita og mga oportunidad sa paggamit o pagpahisama sa inyong kinabuhi unsay inyong nakat-unan samtang kamo nagtuon sa mga kasulatan sa inyong kaugalingon (tan-awa 1 Nephi 19:23).

